

INUIT ATAQATIGIIT INATSIARTUNI



30. august 2026

UKA2026/298

Naqqiut

Siunnersuut 31. juli 2026-meersoq taarserpaa

Inatsisartut Suleriaasianni § 33 naapertorlugu aalajangiiffigisassatut siunnersuut tulliuuttoq matumuuna saqqummiuppara:

Deepfakesinik ajoqusiisunik sananermik, siaruarterinermik atuinnermillu inerteqquteqalernissaq siunertaralugu silassorissuusiap maleruagassiuunneqarnissaa pillugu Inatsisartut inatsisissaattut siunnersuummik saqqummiussinissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut. Inatsisartut inatsisissaatut siunnersuut kingusinnerpaamik UKA 2027-mi saqqummiunneqassaaq.

Inatsisartunut ilaasortaq Pipaluk Lynge, Inuit Ataqtigiiit

Tunngavilersuut:

Teknologimi ineriartorneq inunnik, tamat oqartussaaqataanerannik inuiaqatigiillu tatiginninnerannik illersuisumik pinissaa, Inuit Ataqtigiiinnut pingaaruteqarpoq. Silassorissuussiaq ineriartortitsinissamut nutaaliornissamullu annertuunik periarfissaqarpoq, peqatigisaanilli aarlerinaatit inatsisiliornikkut erseqqissumik illersorneqartariaqartut malitsigai.

Silassorissuusiapi ineriartornerup *deepfakes*-itut taaneqartut sananeqarsinnaalernerat pisinnaangortippaa, taamaaliornermi assit, nipit videollu piviusumit sanaanit immikkoortinneqarsinnaajunnaarsingajallugit sananeqarsinnaangortippai. Teknologi pitsaasorpassuarnik imaqarpoq, peqatigisaanilli innuttaasunut, oqartussanut inuiaqatigiinnullu ataatsimut aarlerinaatinik annertuunik malitseqarluni.

Silassorissuussiaq inunnik innarliinnermut oqartussaaqataanermiluunniit ingerlatsivinnut tatiginninnitsinnik ajortisaarinnermut atorneqanngisaannartariaqartoq, Inuit Ataqtigiiit isumaqarput. Deepfakesit akornusiisinnaasut inuinnaat inuunerannik eriaginninneq innarlarsinnaavaat, kinaassutsimik peqquserlunnermi atorneqarluni, paasissutissanik eqqunngitsunik siaruarterilluni, tamat oqallinnerannik sunniilluni inuiaqatigiinnilu ingerlatsivinnut tatiginninnermik ajortisaarilluni atorneqarsinnaavoq. Tamatuma saniatigut teknologi uumisaarinnermut, pinngitsaaliilluni aningaasannanniarnernut, digitalikkut persuttaanermit atorneqarsinnaavoq, tassani atoqatigiinnermut tunngasunik salloqittaatinik sananeq putusaarisumilluunniit oqaaseqarnerit, inuit ataasiakkaat tusaamaneqarnerannik inuunerannillu akornusiisinnaasut.

INUIT ATAQATIGIIT INATSIARTUNI



Taamaammat Kalaalit Nunaat inuiaqatigiinni silassorissuusiak ileqqorissaartumik akisussaassuseqartumillu atorneqarnissaannik akisussaassutsimik tiguisut akornanniittarineqartoq, Inuit Ataqtigii isumaqarput. Inatsisiliornikkut erseqqissumik innuttaasunik silassorissuusiamik atornerluinermik illersuisumik sinaakkuteqarnissaq pisariaqartinneqarpoq, tamannalu teknologip nangittumik akisussaassuseqartumik inuiaqatigiinnullu iluaqutaasumik atorneqarnera ineriartortinneqarsinnaavoq.

Taamaammat deepfakesinik akornusiisinnaasunik sanaartornermik, siaruarterinermik atuinermillu inerteqquteqalersitsisumik Inatsisartut inatsisissaattut siunnersuummik saqqummiussinissamik Naalakkersuisut peqquneqarput, tassani deepfakesit:

- inuit eqqissillutik inuunerannik innarluusut,
- tamanik salloqittaannissamik siunertaqartunik,
- kinaassutsimik peqquserlunnernut, pinngitsaaliilluni aningaasannanniarnernut allatulluunniit pinerlunnernut, imaluunniit
- allatut iliorluni inunnik ataasiakkaanik inuiaqatigiilluunniit soqutigisaannik annertuumik piaarluni ajoqusiisinnaasut.

Inuit Ataqtigii qanorlu ililluta innuttaasut inuiaqatigiillu silassorissuusiamik atornerluinikkut deepfakesinillu ajoqusiisunut pitsaanerpaamik illersornissaat pillugu Inatsisartut siunnersuummik suliarinninnissaat qilanaaraat.

Pisortanut aningaasatigut allaffissornikkullu kinguneqaatit:

Aalajangiiffigisassatut siunnersuummik Naalakkersuisunut peqqusineq annikitsuinnarnik inatsisissatut siunnersuummik suliaqarnermut atatillugu Naalakkersuisunut allaffissornikkut aningaasartuuteqarnermik kinguneqassangatinneqarpoq. Inatsisissatut siunnersuummik suliarinninneq AC-fuldmægtigip ukiup affaani sulineranut naleqartumik isumalluutinik atuiffiussasoq nalilerneqarpoq. Aningaasatigut allaffissornikkullu kinguneqaatit allat inatsisissatut siunnersuummik saqqummiussinermut atatillugu qulaajarneqassapput.

Namminersortunut aningaasatigut allaffissornikkullu kinguneqaatit:

Aalajangiiffigisassatut siunnersuut namminersorlutik inuussutissarsiorturnut aningaasatigut allaffissornikkulluunniit kinguneqaateqassanngilaq. Kinguneqaataasinnaasuni inatsisissatut siunnersuutip ilusilersorneqarnera apeqqutaassaaq, Naalakkersuisullu tassanga saqqummiussinerannut atatillugu nalilerneqassalluni.

Innuttaasunut aningaasatigut allaffissornikkullu kinguneqaatit:

INUIT ATAQATIGIIT INATSIARTUNI



Aalajangiiffigisassatut siunnersuut innuttaasunut toqqaannartumik aningaasatigut kinguneqaatissaqanngilaq. Akerlianik siunnersuut silassorissuusiamik atornerluinermut deepfakesinillu ajoqusiisunik atornerluinermut inatsisitigut toqqammavissiiinikkut innuttaasut eqqissillutik inuunerannik, inatsisitigut illersugaanerannik tusarfinnullu digitaliusunut tatiginninnerannik nukittorsaassasoq naatsorsuutigineqarpoq.